



Na osnovu člana 22 Statuta Brčko distrikta Bosne i Hercegovine („Službeni glasnik Brčko distrikta BiH“ broj 17/08) Skupština Brčko distrikta BiH na 69. redovnoj sjednici održanoj 11. juna 2008. godine, usvaja

**ZAKON
O IZMJENAMA I DOPUNAMA ZAKONA O RADU U
BRČKO DISTRIKTU BOSNE I HERCEGOVINE**

Član 1

U Zakonu o radu u Brčko distriktu Bosne i Hercegovine - prečišćeni tekst („Službeni glasnik Brčko distrikta BiH“, brojevi: 19/06 i 19/07) u članu 3 iza stava 1 dodaje se stav 2 koji glasi:

„Poslodavac - fizičko lice dužan je se prijaviti na PIO i zdravstveno osiguranje.“

Stav 2 postaje stav 3.

Član 2

U članu 20 stavovi 2 i 3 mijenjaju se i glase:

“(2) Za vrijeme trajanja pripravničkog staža pripravnik ima pravo na 80% plaće poslova radnog mjesta na koje se prima.

(3) Pripravnik ima prava i obaveze regulisane ovim zakonom, kolektivnim ugovorom, pravilnikom o radu i ugovorom o pripravničkom stažu.“

Član 3

Član 21 mijenja se i glasi:

“(1) Ako je stručni ispit ili radno iskustvo uslov za obavljanje poslova određenog zanimanja, poslodavac može lice koje završi školovanje za takvo zanimanje primiti na stručno osposobljavanje za samostalan rad, bez zasnivanja radnog odnosa (volonterski rad).

(2) Volonterom se smatra lice koje nakon završene srednje škole, više škole ili fakulteta po prvi put radi u tom zanimanju.

(3) Ugovor o volonterskom radu se zaključuje u pisanoj formi na dan početka rada volontera i po jedan primjerak dostavlja se nadležnom organu za zapošljavanje i nadležnom Fondu PIO u roku od pet dana od dana njegovog zaključivanja, radi evidencije i kontrole.

- (4) Period volonterskog rada računa se u pripravničku praksu i radno iskustvo kao uslov za rad na određenim poslovima.
- (5) Za vrijeme volonterskog rada, volonter nema pravo na zaradu.
- (6) Poslodavac osigurava invalidsko osiguranje volonteru u slučaju povrede na radu ili profesionalne bolesti u skladu sa posebnim propisima.
- (7) Volonter ima pravo na zdravstveno osiguranje kako je to regulisano propisima o zdravstvenom osiguranju nezaposlenih lica.
- (8) Volonter ima pravo na dnevni odmor u toku rada, odmor između dva radna dana i sedmični odmor.”

Član 4

U članu 58 dodaje se stav 3 i glasi:

“Plaća se isplaćuje u novcu.”

Član 5

Naziv poglavlja XVII mijenja se i glasi:

“NADZOR NAD PRIMJENOM PROPISA O RADU, OVLAŠTENJA INSPEKTORA I PRIVREMENA ZABRANA RADA”.

Član 6

Iza člana 105 dodaju se novi članovi 105a i 105b i glase:

“Član 105a

U vršenju inspekcijskog nadzora inspektor za rad i radne odnose ima pravo i obavezu preduzimati radnje, odnosno nalagati upravne i druge mjere u skladu sa ovim i drugim zakonima.

Član 105b

(1) Prilikom inspekcijskog nadzora, inspektor za rad i radne odnose rješenjem će privremeno zabraniti poslodavcu obavljanje djelatnosti, ako u ostavljenom roku nije izvršio rješenje o otklanjanju nedostataka kojim je naloženo da sa licem zatečenim na radu u momentu inspekcijske kontrole zaključi ugovor o radu i prijavi ga nadležnom fondu penzijsko-invalidskog i zdravstvenog osiguranja.

(2) Privremena zabrana obavljanja djelatnosti traje do otklanjanja utvrđenih nedostataka, odnosno nepravilnosti, a najkasnije do okončanja prekršajnog postupka.

(3) Rješenje iz stava 1 ovog člana izvršava se pečaćenjem radnih i pomoćnih prostorija, odnosno onemogućavanjem korištenja radnih i pomoćnih prostorija, uređaja i drugih sredstava rada.

(4) Žalba na rješenje o izricanju mjere o zabrani obavljanja djelatnosti ne odlaže izvršenje rješenja.

(5) Poslodavac je odgovoran za čuvanje i osiguravanje radnih i pomoćnih prostorija, uređaja i drugih sredstava, u slučaju iz stava 3 ovog člana.

(6) Poslodavac iz stava 1 ovog člana, pismenim podneskom, ima pravo da u roku 24 sata od dana pečačenja poslovnih prostorija zatraži da se zapečaćena prostorija u prisustvu inspektora za rad i radne odnose privremeno otpečati zbog iznošenja kvarljivih namirnica ili preduzimanja sigurnosnih i drugih mjera radi sprečavanja štete, nakon čega je inspektor dužan poslovne prostorije ponovo zapečatiti.

(7) Pismeni podnesak iz stava 6 ovog člana podnosi se inspektor za rad i radne odnose koji je izvršio pečačenje.“

Član 7

Član 109 mijenja se i glasi:

„Član 109

(1) U slučaju da se pojavi potreba za obavljanjem privremenih i povremenih poslova, koji podrazumijevaju posebne zadatke i poslove, može se zaključiti ugovor o obavljanju privremenih i povremenih poslova pod uslovom da je obavljanje tih zadataka i poslova predviđeno posebnim zakonom i podzakonskim aktima i da ne traje duže od 90 dana u toku kalendarske godine.

(2) Za obavljanje poslova iz stava 1 ovog člana zaključuje se ugovor u pisanoj formi koji sadrži:

- a) vrstu, način, mjesto i rok izvršenja posla;
- b) iznos naknade za izvršeni posao i
- c) druga prava i obaveze.,,

Član 8

U dosadašnjem članu 110 stavovi 4, 5, 6 i 7 se brišu.

Član 9

U članu 111 stavu 1 tačka 6 mijenja se i glasi:

“Ako postupi suprotno članovima 19 i 20 ovog zakona.”

U članu 111 stavu 1 tačka 7 ovog zakona mijenja se i glasi:

“Ako postupi suprotno članu 21 ovog zakona.”

U članu 111 stavu 1 tačka 24 mijenja se i glasi:

“Isplati plaću manju od utvrđene kolektivnim ugovorom, pravilnikom ili ugovorom o radu ili plaću ne isplaćuje u novcu.”

U članu 111 stavu 1 tačka 25 mijenja se i glasi:

“Ne isplati plaću u roku utvrđenom kolektivnim ugovorom, pravilnikom ili ugovorom o radu i ne uruči pismeni obračun plaće zaposleniku.”

U članu 111 stavu 1 iza tačke 25 dodaje se tačka 26 koja glasi:

“Redovno ne isplaćuje zaposlenom naknadu plaće u skladu s članom 61 stavom 1 ovog zakona».

U istom članu tačke 26, 27, 28, 29, 30, 31, 32, 33, 34, 35, 36 i 37 postaju tačke 27, 28, 29, 30, 31, 32, 33, 34, 35, 36, 37 i 38.

U članu 111 stavu 1 iza tačke 37 dodaje se tačka 38 i glasi:

“Ako postupi suprotno članu 109 ovog zakona.”

U istom članu tačke 38 i 39 postaju tačke 39 i 40.

Član 10

Ovaj zakon stupa na snagu osmog (8.) dana od dana objavljivanja u “Službenom glasniku Brčko distrikta BiH”.

Broj: 01-02-109/08
Brčko, 11. juna 2008. godine

PREDSJEDNIK
SKUPŠTINE BRČKO DISTRIKTA BiH
Prof. dr. Milan Tomić, s.r.

